

HEDABIDEAK. Hamahirugarren urtez, nabarmendutako komunikabideei sariak eman dizkie 'Argia' astekariak

«Lana hobeto egiteko akuilua»

Goienkaria, Pantzo Irigarai, Anjel Alkain, Elhuyar, BBK eta Bertsozaleen Elkartearentzat izan dira 2002 Argia Sariak

Iker Aranburu | LASARTE-ORIA

Aurreko urtean komunikazioaren munduan nabarmendutako pertsona edo hedabideei sariak eman zizkien atzo, hamahirugarreneneko, *Argia* astekariak. *Goienkaria* aldizkaria (prentsa), Pantzo Irigarai (irratia), Anjel Alkain (telebista), Elhuyar (Internet) eta BBK (publizitatea) izan ziren sarituak eta Bertsozaleen Elkarteak jaso zuen merezimenduzko Argia Saria.

Ixabel Bereziartua *Argiako* idazkariak azpimarratu zuenez, 2001. urtean euskal kulturak eta hedabideek albiste on asko sortu dituzte. Ordainetan, «gure hizkuntzaren aurka eta euskaraz bizitzeko egiten ditugun

ELKARTASUNA

Agurra hedabide jazarriei

Argiak elkartasuna adierazi zien joan den urtean jazarpena jasan duten hedabideetako langileei, hala nola, EGUNKARIAKO eta *Garako* zuzendariari, *Ttipi Ttipako* Jon Abrili, Ipar Euskal Herriko *Ekaitza* astekariari eta ETArek atentatuak jasandako hedabide batzuetako arduradun eta profesionalei.

ahaleginen kontra ere ez da albiste faltarik izan», esan zuen. Erasoan gainetik eta azpitik, Argia Sariak «lana hobeto egitea akuilatzeko asmoz, bihotzez emandako sariak» zirela esan zuen, Lasarte-Oriako Txixtar-din Beltza jatetxean egindako ekitaldian.

«Arriskuak saria jaso du»

Prentsa idatziaren saria *Goienkaria*-rentzat izan zen, Debagoiako (Gipuzkoa) aldizkari guztiak bat eginez eskualde osorako astekaria sortzean beste lurralde batzuentzat eredu izan daitekeen «esperientzia berritzailea» sortzeagatik. *Goienkariaren* izenean, Eneko Azkaratek saria eskertu eta «une egokian» datorrela azpimarratu zuen, «irakurle gehienek bezalaxe, hartutako arriskuak aitoritzen zaizkigulako».

Txalo zaparrada beroa jaso zuen irratia ataleko irabazleak ere, Pantzo Irigarai kazetari, antzezle, antzerkilari eta gidoigile baxenabartarrak. Sariarekin, Irulegi Irratiko esatariaren lana-



GARI GARAIALDE / ARGAZKI PRESS

SARITUAK. Antxon Mendizabalek zuraz eta arbelaz egindako irudia jaso zuten irabazleak: Imanol Lazkano, Endika Ruiz de Zarate (BBK), Leire Cancio eta Eider Carton (Elhuyar), Pantzo Irigarai, Eneko Azkarate (Goienkaria) eta Anjel Alkain.



GARI GARAIALDE / ARGAZKI PRESS



GARI GARAIALDE / ARGAZKI PRESS

MEREZIMENDUZKO SARIA. Imanol Lazkanok jaso zuen, Bertsozaleen Elkartearen izenean. Goian, Bandres, Otamendi eta Aizpurua, beste gonbidatuen artean.

ren «orijinaltasuna, indarra eta piperra» eskertu nahi izan zuen *Argiak*. Irigaraiak gogoratu zuen data esanguratsua aukeratu zutela saria emateko, gaur bertan, 12:30ean, 20 urte beteko baitira Nafarroa Behereko euskal irratia lehen aldiz uhineratu zenetik. Saria irratia osoarentzat zela aldarrikatu zuen Irigaraiak, «euskarari merezi duen maila eman baitio».

Telebista arloko saria Anjel Alkain aktorearentzat izan da aurtan, gauero ETBko *Sorginen Laratza* saioan «maitasunez» antzeztzen dituen pertsonaiak «jada klasikoak» bilakatu direlako. Ikusleek pertsonaia horietako batzuk «oso hurbilekoak» sentitzen dituztela onartu

zuen Alkainek eta ikusleen «barre txikiak» sortzeak «kristoren poza» ematen ziola aitortu zuen.

Zientzia, euskaraz eta sarean

Elhuyarren web orriak —www.zientzia.net— jaso zuen Internet saileko saria, zientziaren mundua euskaraz hedatzen egiten duen lan handiagatik. Saria jasotzean, Leire Cancio eta Eider Cartonek euskaldunak animatu zituzten Internet euskarazko edukiez betetzeko, arlo horretan «lan dezente baitago egiteko».

BBK aurrezki kutxarentzat izan zen publizitate arloko 2002 Argia Saria. Astekariak azpimarratu zuenez, publizita-

tea euskaraz egitea kosta egiten zaie enpresa askori, baina Bizkaiko Aurrezki Kutxak «euskararen alde apustu garbia egin du».

Azkenik, Merezimendu Berezikoko saria Imanol Lazkanok jaso zuen Bertsozaleen Elkartearen izenean. Belodromoko finalaren atarian elkarteak kaleratutako web orria saritu zuen horrela *Argiak*. «Euskarazko komunikazio potentee-na egiten dute bertsolariek. Albisteak, iritzia, kronika, kritika, publizitatea, hizkuntzaren kalitatea... zer ez du lantzen bertsolaritzak? Eztarritik abiatuta, sexuen arteko hesia gaindituta, artistaren eta artzainaren arteko elkarlana lortuta, Inter-

neterako jauzia egin dute», nabarmendu zuen astekariak.

Pertsonalitate ugari

Euskal kulturako pertsona eza-gun ugari bildu ziren Argia Sariaren banaketara. Han ziren, besteak beste, Jon Alonso, Joxe Mari Iturralde eta Koro Irastortza idazleak, Antton Olariaga eta Asisko Urmeneta marrazkilariak, Xabier Mendi-guren Kontseiluko presidentea, EGUNKARIAKO Iñaki Uria, Martxelo Otamendi eta Joan Mari Torrealdei, Joxe Leon Otaño AEK-ko arduraduna, Sagrario Aleman IKAKoa. Go-tzon Lobera Bizkaiko Kultura diputatua eta Luis Mari Bandres Gipuzkoakoa.